

ՋՈՒԼԻԵՏԱ ԳՅՈՒԼԱՄԻՐՅԱՆ

# ՄԱՅՐԵՆԻ

3

*Դասագիրք  
Սիյունքի դպրոցների համար*



**ԶԱՆԳԱԿ**  
ՀՐԱՏԱՐԱԿԶՈՒԹՅՈՒՆ

ԵՐԵՎԱՆ 2014

ՀՏԴ 373.167.1:809.198.1(075.3)

ԳՄԴ 81.2Հ g7

Գ 673

Գյուլամիրյան Զուլիետա

Գ 673 ՄԱՅՐԵՆԻ 3: Դասագիրք Սփյուռքի դպրոցների համար/  
Զ. Գյուլամիրյան.— Եր.: «Զանգակ» հրատ., 2014.— 80 էջ:

ՀՏԴ 373.167.1:809.198.1(075.3)

ԳՄԴ 81.2Հ g7

**ISBN 978-9939-68-294-5**

© Գյուլամիրյան Զ., 2014

© «Զանգակ-97» ՍՊԸ, 2014

Ես \_\_\_\_\_ եմ:

Սովորում եմ \_\_\_\_\_:

(քաղաքը, դպրոցը, դասարանը)

Հայրս \_\_\_\_\_ է:

Մայրս \_\_\_\_\_ է:

Հայերենի իմ ուսուցիչը \_\_\_\_\_ -ն է:

Ապագայում ուզում եմ \_\_\_\_\_ դառնալ:

Իմ սիրած լեզուներն են \_\_\_\_\_:

Սիրում եմ խաղալ \_\_\_\_\_:

### ԻՄ ԴԱՍԸՆԿԵՐՆԵՐԸ

---

---

---

---

---


---

---

---

---

---



## ՀԱՅԵՐԻ ՀԱՅՐԵՆԻՔԸ ՀԱՅԱՍՏԱՆԸ Է



*ՀՀ Կառավարության  
շենքը Հանրապետության  
հրապարակում*

Հայաստանը հայերի հայրենիքն է: Հայերը Հայկական լեռնաշխարհի առաջին բնակիչներն են: Մենք հպարտ ենք, որ աշխարհի գեղեցիկ լեզուներից մեկը հայերենն է: Մեր հայրենիքն ունեցել է տարբեր անուններ՝ Արարատյան թագավորություն, Վանի թագավորություն, Հայք, Հայաստան: Օտարներն այն անվանել են Արմենիա, Նաիրի, Հայասա, Ուրարտու և այլն:

Հայ ժողովուրդն ունի հարուստ ու արժեքավոր մշակույթ:

### Հարցեր և առաջադրանքներ



1. Բացատրիր՝ ինչ է նշանակում **հայերը Հայկական լեռնաշխարհի առաջին բնակիչներն են**:
2. Հիշիր Հայաստանի մայրաքաղաքների անունները: Հետաքրքրվիր՝ որ տարածքներում են դրանք եղել:

3. Ուշադիր դիտիր «Մայր Հայաստան» արձանը: Պատմիր՝ ինչ գիտես նրա մասին:



4. «Հրաշք տեսրուճ» փակցրո՛ւ Հայաստանի տեսարժան վայրերի և մշակութային արժեքների նկարներ: Գրիր դրանց մասին տեղեկություններ:

## ՀԱՅԱՍՏԱՆ

### *Պարվական Խաչատրյան*

Հայաստանը  
Իմ անոնն է,  
Ազգանոնը,  
Ինձ ուժ տվող զորությունն է:  
Իմ լեզուն է, այբուբենը,  
Որ կոչվում է հայրենի տուն:  
Եվ ես հիմա իմ տան պատին  
Նոր-նոր քարեր պիտի դնեմ,  
Որ գնալով հզորանա,  
Ծլարձակի<sup>1</sup> ու նորանա:

### Իմ բառարանը

<sup>1</sup> ծլարձակել – փթթել, ծաղկել, բարգավաճել

5. Բացատրիր «ինձ ուժ տվող զորությունն է» արտահայտության իմաստը:

6. Որոշիր **ծլարձակել** բառի արմատները: Բառիմաստը բացատրիր արմատների օգնությամբ:

7. Որոշիր տրված բառերի արմատները և բացատրիր, թե ինչ իմաստային տարբերություն կա այդ բառերի միջև:

հայ – հայեր

անուն – անուններ

լեզու – լեզուներ


գետ – գետեր

Ճիշտ նկատեցիր. բառերն իրարից տարբերվում են **-եր** և **-ներ** մասնիկներով:

## Հիշիր

**Միավանկ** բառերի հոգնակին հիմնականում կազմվում է **-եր** մասնիկով, իսկ **բազմավանկ** բառերինը՝ **-ներ** մասնիկով:

*Օրինակ՝ նավ – նավ**եր**, աթոռ – աթոռ**ներ**:*



## ՀԱՅԱՍՏԱՆԻ ՄԱՐԳԱՐԻՏԸ

Հայաստանի քարտեզին նայելիս անպայման կնկատես, թե որքան շատ լեռներ ունի մեր հայրենիքը: Սակայն դրանց շրջակայքում ուշադրություն է գրավում Սևանա լիճը: Հնում լիճը եղել է փոքր, սակայն հզոր հրաբուխի հետևանքով փակվել է Սևանից դուրս հոսող գետի ճանապարհը: Դրանից հետո Սևանի ջրերը շատացել են:



### Ես հիշում եմ

Բառի հիմնական իմաստն արտահայտող մասը կոչվում է **արմատ**:

*Օրինակ՝ գյուղական, լեռնային, անհամ:*

Ընդգծված մասերը բառերի արմատներն են:

«Հայաստանի մարգարիտը» պատմության մեջ հանդիպեցիր **հրաբուխ** բառին: Եկ որոշենք այդ բառի արմատները: Հրաբուխ. **հուր**, որը նշանակում է **կրակ** և **բխել**, որ նշանակում է **դուրս թափվել՝ հորդել**:

## ՍԵՎԱՆ

*Գեղամ Սարյան*

Սևանի կապույտ ջրեր,  
Կարծես թե նազում<sup>1</sup> եք դուք,  
Կարծես թե ափերն ի վեր  
Կարկաչով<sup>2</sup> վազում եք դուք:

Ձեր շուրջը սարեր կան ձեր,  
Նրանց պատկերն է ձեր սրտում,  
Կարծես թե հազարագույն,  
Բյուրեղյա<sup>3</sup> վազում եք դուք:

Սևանի կապուտանկ ջրեր,  
Նոր կյանքի ալիքն եք դուք,  
Դարձել եք արտ, այգիներ,  
Բերքառատ բարիք եք դուք:



*Տեսարան Սևանա լճից*



## Իմ բառարանը


- <sup>1</sup> **նագել** – նագանքով շարժվել
- <sup>2</sup> **կարկաչ** – հոսող ջրի մեղմ ձայն, խոխոջ
- <sup>3</sup> **բյուրեղյա** – այստեղ՝ բյուրեղի նման մաքուր, վճիտ

### Հարցեր և առաջադրանքներ



1. Ուշադիր դիտիր Հայաստանի քարտեզը, ցնց տուր Սևանա լիճը: Նկատեցիր՝ նրա շուրջը փռված են գեղեցիկ լեռներ: Դրանք Գեղամա լեռներն են:
2. Հետաքրքրվիր՝ ինչ ձկներ են ապրում Սևանում:
3. Ըստ նմուշօրինակի՝ կազմիր նոր բառեր:  

ծուկ – ձկնեղեն	սահման – անսահման
միս –	տուն –
ջուր –	օգուտ –
4. Ինքնաթելադրությամբ գրիր բանաստեղծության առաջին տունը:



## ՇԻՆԱՐԱՐ ԵՆ ՀԱՅԵՐԸ

Սիրելի՛ հայորդի, ես ուզում եմ, որ դու իմանաս, թե ինչպիսին են եղել քո պապերը: Նրանք եղել են շինարար, բարի ու խաղաղասեր, կառուցել են եկեղեցիներ, գործարաններ, ծառ են տնկել ու իրենց զավակներին էլ սովորեցրել են նույնը անել: Հայերն ապրում են աշխարհի տարբեր երկրներում, ամենուր նրանք կառուցում են և ստեղծում:



## Հարցեր և առաջադրանքներ



1. «Հրաշք տեսրում» փակցրո՛ւ քեզ ծանոթ նշանավոր հայ մարդու նկար: Պատմի՛ր նրա մասին:
2. Կարդա՛ բառերը, որոշի՛ր, թե ո՛ր տառն էս այլ հնչյունով արտաբերում:  
երգ                      մարգարիտ                      ձագ  
կարագ                      օգուտ                      Սարգիս
3. Սովորի՛ր դրանք թելադրությամբ գրել:

## ԿԱՄՈ՛ՒՐՋ ԿԱՌՈՒՑԻՐ

*Մարո Մարգարյան*

Հենց որ ջուր տեսնում,  
Առվակ էս շինում,  
Ափերն ամրացնում,  
Կամուրջ էս դնում:

Կամուրջ կառուցիր,  
Իմ փոքրիկ տղա,  
Միացրո՛ւ անջատ  
Ափերն աշխարհի:

Որտեղի՞ց գիտես,  
Իմ պայծա՛ռ գարուն,  
Թե ինչ թանկ բան է  
Կամուրջն աշխարհում:

Ճամփաներ շինիր  
Աշխարհի վրա  
Ամենազորեղ,  
Դիմացկուն քարից:

4. Ինչո՞ւ է, հեղինակի կարծիքով, կամուրջը կարևոր շինություն:
5. Բացատրի՛ր բանաստեղծության վերջին քառատողի իմաստը:

**6. Որոշի՛ր տրված բառերի արմատները, բացատրի՛ր բառազույգերի տարբերությունը:**

գարուն – գարնանային      զորեղ – ամենազորեղ  
կամուրջ – կամրջակ      առու – առվակ

Նկատեցի՛ր՝ արմատների վրա ավելացած մասնիկները նոր իմաստ՝ նշանակություն են տվել բառին: Տես՝ **կամուրջ** բառի վրա ավելացել է **-ակ** մասնիկը, ու կամուրջը դարձել է ավելի փոքր՝ կամրջակ:


## Հիշի՛ր

Այն մասնիկը, որը, ավելանալով բառի սկզբին կամ վերջին, նրան նոր իմաստ է տալիս, կոչվում է **ածանց**:

*Օրինակ՝ միրգ – մրգային, սահման – անսահման:  
Մրգային, անսահման բառերը ածանցավոր են:*



*Կիևյան կամուրջը Երևանում*



## ԵՍ ՀԱՅ ԵՄ

*Սուրեն Սուրադյան*

Պապերս՝ փառապանծ<sup>1</sup>, քաջագուն<sup>2</sup>,  
Անցել եմ երկար ճանապարհ,  
Հին են երգերը, իմ լեզուն,  
Եղել եմ վարպետ շինարար:

Երգս՝ դարավոր,  
Միտքս՝ թևավոր,  
Ես հայ եմ,  
Մենք հայ ենք  
Զորավոր<sup>3</sup>:



*Հին հայկական դրամ՝  
Տիգրան Մեծի պատկերով*

Իմ տունը հավերժ<sup>4</sup> է, միշտ կանգուն,  
Ուզում եմ ապրել ես խաղաղ,  
Ապրիր դու, Հայաստան իմ ծաղկուն,  
Հայրենի՛ իմ տուն, իմ օջախ:

## Իմ Բառարանը

- <sup>1</sup> **փառապանծ** – փառքի ու պարծանքի արժանի
- <sup>2</sup> **քաջագուն** – քաջարի տոհմից, ազնվագարն, ազնվական
- <sup>3</sup> **զորավոր** – ուժեղ, հզոր
- <sup>4</sup> **հավերժ** – մշտապես, հավիտենական, անվերջ

## Հարցեր և առաջադրանքներ



1. Ինչպիսի՞ն են հայերը՝ ըստ բանաստեղծության:
2. Ուշադիր կարդա և գրիր **հայրենիք**, **հայրություն**, **անհայր**, **Հայրապետ** բառերը: Որոշի՛ր այն բառը, որ կա բոլոր բառերի մեջ:
3. Կարդա՛ տրված բառերը, սովորի՛ր ուղղագրությունը և պատրաստվի՛ր գրելու թելադրություն:  
աշխարհ                      շնորհք                      շնորհակալություն  
ճանապարհ                շնորհակալ                ճանապարհորդ
4. Գրի՛ր ինքնաթելադրություն:

*Իայասարանք իմ անունն է,  
ինչ ուժ Կվորդ Կորությունն է:*

## ՀԱՅԱՍՏԱՆՆ ԻՄ ՊԱՊԵՐԻ ԵՐԿԻՐՆ Է, ՀԱՅԱՍՏԱՆՆ ԻՄ ՀԱՅՐԵՆԻՔՆ Է

Հայերը, որտեղ էլ որ ապրել են, առաջին հերթին եկեղեցի և դպրոց են կառուցել: Հայերն, օրինակ, Արցախ աշխարհի բնիկ ժողովուրդն են: Լսի՛ր պատմեմ մի վանքի մասին, որն արցախցիները կառուցել են շատ դարեր առաջ:



*Գանձասարի վանքը Արցախում*

## ԳԱՆՁԱՍԱՐԻ ՎԱՆՔԸ

Գանձասարի վանքն Արցախում Գանձասար լեռան վրա է: Այնտեղ տանող ճանապարհին անցնում է Վանք գյուղի միջով: Գանձասարը կառուցել են մեր պապերը մոտ ութ հարյուր տարի առաջ: Վերջերս այն նորոգվել է ու դարձել գործող վանք: Գանձասար են այցելում ոչ միայն Արցախի ու Հայաստանի բնակիչները, այլև Արցախ եկած զբոսաշրջիկներ ու հյուրեր աշխարհի տարբեր երկրներից:



*Գանձասարի վանքը Արցախում*

- 5.** Կարդա՛ և ընդգծի՛ր այս պատմության մեջ գործածված բարդ բառերը:

## *Գիտե՞ս, որ...*

Արցախում կա մի սուսի: Այն տարածաշրջանի ամենաբարձր ու ամենատարեց ծառն է՝ մոտ 2000 տարեկան: Ըստ ավանդության՝ նրա ստվերի տակ հանգստացել են Մեսրոպ Մաշտոցը, Սայաթ-Նովան, Մովսես Խորենացին: Այդ ծառի փչակը երեքսենյականոց բնակարանի չափ է:



*2000 տարեկան սուսին*


**6. Պատմի՛ր՝** ինչ իմացար Արցախի մասին:

### **<իշի՛ր**

Արցախում ապրողներին ասում են արցախցի:  
Երևանում ապրողներին՝ երևանցի:

**7. Իսկ ինչպե՞ս են ասում Գյումրիում, Լոռիում, Ապարանում ապրողներին:**





## ՀԱՅԱՍՏԱՆԻ ՈՍԿԵ ԱՇՈՒՆԸ

Հայաստանում տարվա բոլոր եղանակները շատ գեղեցիկ են: Սակայն շատ շքեղ է Հայաստանի աշունը: Ծառերն ու թփերը, դաշտերն ու այգիները աշնանը ծածկվում են ոսկեդեղին ու նարնջագույն տերևներով, և թվում է՝ ողջ բնությունը ոսկի հանդերձներ<sup>1</sup> է հագել: Արևահամ են Հայաստանի մրգերը՝ սև սալորն ու դեղին տանձը, թավշյա<sup>2</sup> դեղձն ու կարմրաթուշ<sup>3</sup> խնձորը, ոսկեհատ ու սևաչխաղողը:



Արա Բաղդասարյան. «Հայաստան»

### Իմ բառարանը

- <sup>1</sup> **հանդերձ** – հագուստ, զգեստ
- <sup>2</sup> **թավշյա** – թավշի նման խավոտ, աղվամազով պատված
- <sup>3</sup> **կարմրաթուշ** – այստեղ՝ մի կողմը կարմիր

## Հարցեր և առաջադրանքներ



1. Որոշիր այս բառերի արմատները: Դրանց իմաստը բացատրիր հենց այդ արմատների միջոցով.

ոսկեդեղին, նարնջագույն, արևահամ, կարմրաթուշ, սևաչ

### ԱՆՈՒՆ (հատված)

*Համո Սահյան*

Աշնան օրերն են հասել,  
Իջել է ամպը սարին,  
Եվ հրաժեշտ է ասել  
Կռունկը մեր աշխարհին:

Բարդին էլ չի սոսափում<sup>1</sup>  
Արագիլի թևի տակ,  
Դեղին թերթեր է թափում  
Առվակի մեջ կապուտակ:



Կարմիր խարույկ է կարծես  
Ծեր տանձենին անտառի,  
Թվում է, թե մոտ վազես,  
Ձեռք ու ոտքդ կվառի...



### Իմ բառարանը

<sup>1</sup> սոսափել – ճյուղերը շարժելով՝ մեղմ ձայն հանել

2. Բացատրիր բանաստեղծության առաջին քառատողի իմաստը:
3. Պատմիր Հայաստանի աշնան մասին՝ ըստ տրված բանաստեղծության:

## Ժողովուրդն ասում է...

Քարունը ծաղիկներով է գեղեցիկ,  
աշունը՝ բերքով:

### 4. Սյունակներից ընտրիր արմատներ և ածանցներ, կազմիր նոր բառեր:

տանձ	-ային
պար	-ական
գյուղ	-ենի
առողջ	-եղեն
միրգ	-ություն

ծուլ	-ոտ
արև	-ություն
անուշ	-ալի
ջուր	-եղեն



Մի բույս գիտեմ դեղնավուն,  
Արևին է նմանվում,  
Որ կողմն արևը թեքվի,  
Բույսը նրան կնայի:

Ինքը՝ փոքրիկ,  
Կարմիր կուժ,  
Դուրսը՝ կոկիկ,  
Ներսը՝ փուշ:

## Ես հիշում եմ

Աշնան ամիսներն են՝ **սեպտեմբեր, հոկտեմբեր, նոյեմբեր:**

### 5. Պատրաստվիր թելադրություն գրելու:

*ամս, բարդի, ջեռփ, իսպույկ, կրունկ, աշխարհ, ուրփ, վառելի*

### Գիտե՞ս, որ...

Հայերն անսահման հյուրասեր են: Ամեն օտարական անցորդի հայ մարդը օթևան կտա ու կպատվի: Հեթանոսության շրջանում հայերն ունեցել են հյուրասիրության աստված՝ Վանատուրը: Նրա գլխավոր մեղիանը Բագավան քաղաքում էր, որը կոչվում էր նաև Դիցավան, այսինքն՝ աստվածների բնակավայր:


## Հիշի՛ր

Միայն արմատից կազմված բառը կոչվում է **պարզ բառ:**

*Օրինակ՝* տուն, ծառ, նկար և այլն:

Երկու և ավելի արմատներով կազմված բառը կոչվում է **բարդ բառ:**

*Օրինակ՝* ջրաներկ, հյուրասենյակ, ծաղկաման:



## ՀԱՅՐԵՆԻ ՏՈՒՆ

Գիտե՛ս՝ հայերը շատ աշխատասեր ժողովուրդ են: Աշխարհի բազմաթիվ երկրներից ժամանած այցելուների հիացնում են հայերի կառուցած եկեղեցիները, թանգարաններն ու արձանները:



*Տաթևի վանքը*

Դրանք հպարտ են հայոց լեռների պես, ամուր՝ հայ մարդու ոգու նման, գեղեցիկ՝ ինչպես հայերը...

Հայաստան այցելողներին հիացնում են Տաթևի, Մարմաշենի, Հաղարծինի, Գանձասարի վանքերը, Հայաստանի մյուս պատմական հուշարձանները:

Հայ մարդը միշտ բարձր է գնահատել հայրենի տունը՝ կառուցված իր հողի վրա:

### *Սովորություն*

Հայերն իրենց որդիներին մաղթում են.

— Տո՛ւն կառուցիր, ծա՛ռ տնկիր, շատ զավակներ ունեցիր:

## Հիշիր

Մեկից ավելի արմատներից և մեկ կամ ավելի ածանցից կազմված բառը կոչվում է **բարդ ածանցավոր**:

*Օրինակ՝* դաս + ա + ցույց + ակ = դասացուցակ:

## Հարցեր և առաջադրանքներ



1. Եթե դու Հայաստանում տուն կառուցեիր, որտե՞ղ և ինչպիսի՞ տուն կուզենայիր կառուցել: Ի՞նչ ծառեր ու ծաղիկներ կտնկեիր ձեր բակում: «Հրաշք տեսրում» նկարի՞ր այդ տունը:

## Հայկական սովորույթյուն

Հայկական ընտանիքներում ծնողները, պապերն ու տատերը մեծ հեղինակություն են: Նրանց խոսքը օրենք է բոլորի համար: Ընտանիքի ավագները խորհուրդներ են տալիս, օրինանքներով խրախուսում տան կրտսեր անդամներին: Ազգի մեծերը նույնպես թողնում են իրենց իմաստուն մաղթանքները<sup>1</sup>, կտակները<sup>2</sup>, որոնք սերունդները սրբությամբ են կատարում:

## ԻՄ Բառարանը

- <sup>1</sup> **մաղթանք** – բարեմաղթություն, հաջողության, առողջության և այլ ցանկության արտահայտություն
- <sup>2</sup> **կտակ** – այստեղ՝ սերունդների վրա իբրև պարտականություն դրվող նվիրական ցանկություն

## ՎԻԿՏՈՐ ՀԱՄԲԱՐՁՈՒՄՅԱՆԻ ԿՏԱԿԸ

Աշխարհահռչակ հայ գիտնական, աստղագետ Վիկտոր Համբարձումյանը թողել է մի կտակ հայոց լեզվին տիրապետելու մասին: Այն ուղղված է բոլոր հայ երեխաներին:

«...Կտակում եմ ինձ հաջորդող սերունդներին, թոռներիս, ծոռներիս՝ տիրապետել հայոց լեզվին: Ամեն մեկը պետք է իր պարտքը համարի ուսումնասիրել հայոց լեզուն, գրագետ լինի հայերենից՝ անկախ նրանից, թե ինչպիսի տոկոս է կազմում նրա մեջ հայկական արյունը: Մենք փոխանցում ենք սերունդներին ոչ թե արյուն, այլ գաղափարներ<sup>1</sup>, և այդ գաղափարների մեջ ինձ համար ամենաթանկը հայոց լեզուն է:

Յուրաքանչյուր սերունդ պարտավոր է հաջորդին սովորեցնել հայոց լեզուն:



Գիտցի՛ր, որ իմ կյանքի ամենամեծ երջանկությունը եղել է և կմնա, քանի ապրում եմ, հայոց լեզվին տիրապետելը:

Ցանկանում եմ երջանկություն բոլորիդ: Դա նշանակում է, որ պետք է լավ տիրապետել հայոց լեզվին:

29. 08. 1994

## Իմ Բառարանը

<sup>1</sup> **գաղափար** – միտք, իմաստ, սկզբունք, համոզմունք


**2.** Պատմի՛ր Վիկտոր Համբարձումյանի կտակի մասին:

**3.** Իսկ ի՞նչ են քեզ պատվիրում պապիկներիդ ու տատիկներիդ:

«Հրաշք տեսրում» գրի՛ առ պապիկներիդ և տատիկներիդ պատվիրանները: Բացատրի՛ր դրանց իմաստը: Մտածի՛ր՝ արդյոք կատարում ես դրանք:

Ընտրի՛ր գրառած պատվիրաններից մեկը և պատմի՛ր, թե ինչ ես անում այն իրականացնելու համար:





## ԸՆՏԱՆԻՔ

Աշխարհի բոլոր ժողովուրդների համար ընտանիքը թանկ է: Ընտանիքը հայրիկն ու մայրիկն են և նրանց երեխաները: Հայ ընտանիքում բոլորի հետ միասին ապրում են նաև պապիկն ու տատիկը, հաճախ նաև՝ հարսներն ու թոռները:



Չկա ավելի մեծ հարստություն հայ ժողովրդի համար, քան նրա բազմանդամ ընտանիքները: Դրանք հայ մարդը պահպանում է որպես սրբություն, ինչպես մայր լեզուն, մայր հայրենիքը:

### Հարցեր և առաջադրանքներ



**1.** Մեծերից հետաքրքրվիր հայ ընտանիքի սովորությունների մասին և պատրաստվիր դասարանում պատմելու:

### Հայ ժողովուրդը օրհնում է...

- Յոթ որդով սեղան նստես:
- Որդիներդ ո՛ղջ լինեն:

- *Տաշտակդ միշտ հա՛ց լինի:*
- *Սեղանդ միշտ բա՛ց լինի:*
- *Ուր որ գնաս, կանա՛չ բուսնի:*

Կարդա՛ այս բանաստեղծությունը ընտանիքիդ անդամների համար:

## ԿԱՆՉՈՒՄ Է ՔԵՁ...

*Մարո Մարգարյան*

Ճամփի եզրին  
 Խոտի մի դեզ<sup>1</sup>,  
 Պարզ մի խրճիթ<sup>2</sup>,  
 Մի պատուհան  
 Կանչում է քեզ,  
 Կանչում է քեզ...

Մի մասրենի  
 Սիրակարոտ<sup>3</sup>  
 Տաք աշխարհից  
 Քո քարքարոտ  
 Կանչում է քեզ,  
 Կանչում է քեզ...

Լավ է աշխարհն,  
 Լավ է ամեն  
 Ճամփա ու տուն՝  
 Բարիքներով,  
 Բույրերով լի...

Բայց թե խորունկ  
 Դու չսիրես  
 Փոքրիկ տունը  
 Քո հայրենի,  
 Դժվար թե քեզ  
 Աշխարհի մեջ  
 Շատ սիրելի  
 Մի տեղ լինի:

## Իմ բառարանը

<sup>1</sup> դեզ – կույտ

<sup>2</sup> խրճիթ – փոքրիկ տուն, հյուղ

<sup>3</sup> սիրակարոտ – սիրով ու կարոտով լցված

## Ե՛կ գրուցենք

Երբևէ պապիկիդ կամ տատիկիդ հարցրե՞լ ես ձեր գերդաստանի<sup>1</sup>, նախնիների<sup>2</sup> զբաղմունքի, կատարած գործերի մասին: Եթե չես հարցրել, ուշ չէ: Հետաքրքրվիր, թե ովքեր են եղել նրանց ծնողները, պապիկներն ու տատիկները, ինչով են զբաղվել, որտեղ են ապրել: Խնդրիր քեզ ցույց տալ նրանց նկարները, պատմել մանրամասներ նրանց կյանքից:



Այդ բոլորը լսելուց հետո պատմիր ձեր գերդաստանի մասին:

Չմոռանաս շարադրանքդ վերնագրել:

### Ի՛մ Բառարանը

<sup>1</sup> **գերդաստան** – մեծ ընտանիք, ազգականների ամբողջություն

<sup>2</sup> **նախնիներ** – նախորդ սերունդներ

**2. Որոշիր պատուհան, սիրակարոտ, քարքարոտ, փորձրիկ բառերի արմատներն ու ածանցները:**

### Հիշիր


Բառի սկզբին ավելացած ածանցները կոչվում են **նախաածանցներ**, իսկ բառավերջին ավելացածները՝ **վերջածանցներ**:

## Սովորություն

Հայերի մեջ ընդունված է պապի և տատի հայկական անունները տալ թոռնիկներին: Դրա մեջ կա այդ ճանապարհով ևս նրանց հիշատակը վառ պահելու խորհուրդը:

3. Հետաքրքրվիր քո անվան պատմությամբ: Եթե այն ուշագրավ է, ներկայացրու ընկերներիդ:
4. Անուններ տուր սեղանի շուրջ նստած ընտանիքի անդամներին: Պատմիր այդ ընտանիքի մասին: Պատմությունդ վերնագրիր:





## ՀԱՅԵՐԻ ԳԱՆՁԸ

Դու գիտես, որ Հայաստանը քարքարոտ երկիր է: Բայց այդ քարքարոտ հողից էլ ժողովուրդը «հաց է քամում»: Իսկ դրն է գաղտնիքը: Հայ ժողովուրդն ունի մի մեծ գանձ: Դա նրա աշխատասիրությունն է: Ահա մի զվարճալի պատմություն այդ մասին:

Աստծուն լուր են տալիս, որ Հայոց աշխարհում օր ու գիշեր աշխատում են, չեն հանգստանում, չեն քնում: Աստված զայրանում է, որ նույնիսկ իր ստեղծած կիրակի օրը հայերը չեն հանգստանում: Նա իր հրեշտակներից մեկին ուղարկում է Հայոց երկիր:

Հրեշտակին տեսնելուն պես հայերը նրա թևից քաշում են ու ասում.

— Ի՞նչ ես կանգնել, արի՛ մեզ հետ աշխատիր:

— Բայց ես ձեզ ասելիք ունեմ,— ասում է հրեշտակը:

— Հետո՛,— պատասխանում են հայերը և շարունակում աշխատել:

Տեսնելով, որ իրեն լսող չկա՝ հրեշտակը սկսում է ինքն էլ աշխատել: Աստված ուղարկում է երկրորդ հրեշտակին: Սա էլ չի վերադառնում: Ուղարկում է երրորդին: Սա էլ է մնում այնտեղ:

Աստված ստիպված ինքն է գնում և թաքուն հետևում, թե հայերն ինչ են անում: Նա հայերի մեջ տեսնում է իր

երեք հրեշտակներին, որոնք ուրախ-ուրախ աշխատում են: Աստված վերադառնում է երկինք՝ ասելով.

— Ես այլևս ոչ մի հրեշտակի չեմ ուղարկի հայերի մոտ: Նրանք իրենց աշխատասիրությամբ կվարակեն բոլորին, և նրանցից ոչ մեկը երկինք չի վերադառնա:

## Հարցեր և առաջադրանքներ



1. Պատմիր, թե ինչպես Աստված իմացավ հայերի աշխատասիրության մասին:

## Հիշիր

Մեկից ավելի արմատներից և մեկ կամ ավելի ածանցից կազմված բառը կոչվում է **բարդ ածանցավոր**:

*Օրինակ՝* աշխատ + ա + սիր + ություն:

## Ժողովուրդն է ասում

- Աշխատանքը բարիք է, ծուլությունը՝ չարիք:
- Ով աշխատի, նա կուտի:
- Աշխատող խոփը կփայլի:
- Աշխատիր ուրիշի համար, սովորիր քեզ համար:

2. Կարդա՛ այս բանաստեղծությունը ընտանիքիդ անդամների համար: Քննարկի՛ր նրանց հետ բանաստեղծի մտքերը:

## ԾՈՒՅԼ ՁԵՌՔԵՐԸ

Շատ լավ գիտեն մայրիկները,  
Հայրիկներն ու բալիկները<sup>1</sup>,  
Որ չի կարող ոչ ոք նստել  
Ոտք չունեցող աթոռակին:

Որ չի կարող կառքը<sup>2</sup> շարժվել,  
Թե անիվներ չկան կարգին,  
Որ չես փրկվի ցրտից ահեղ<sup>3</sup>,  
Վառարանում թե փայտ չկա:

Որ ասեղը ասեղ չէ դեռ,  
Թե անցք չունի պոչի վրա:  
Ճիշտ այդպես էլ մեր այս կյանքում  
Ձեռքերը՝ ծույլ ու անհոգի,  
Թե աշխատանք չեն կատարում,  
Հարկավոր չեն և ոչ մեկի:

### Իմ բառարանը

<sup>1</sup> **բալիկ** – փոքրիկ երեխա, որդյակ, մանկիկ

<sup>2</sup> **կառք** – ծածկ ունեցող մարդատար երկանիվ կամ քառանիվ սայլ


<sup>3</sup> **ահեղ** – սարսափելի, ահավոր

- 3.** Ինչ է սովորեցնում այս բանաստեղծությունը:  
Որոշիր և ասա՛ մեկ նախադասությամբ:

### *Սովորույթյուն*

Երբ հայը տուն է կառուցում, յուրաքանչյուր բարեկամ ու հարևան պիտի առնվազն մեկ քար դնի նրա պատին:





Հովհաննես  
Թումանյան

## ԾԱՂԻԿՆԵՐԸ

— Ո՞ւր գնացին ծաղիկները:  
— Սո՛ւս, քնած են հողի տակ՝  
Տաք ծածկված ողջ ձմեռը  
Ձյուն-ծածկոցով սպիտակ:

Կգա գարնան արևն էլ ետ  
Իր շողերով կենդանի,  
Ձմռան սաստիկ ցրտերի հետ  
Ձյուն-ծածկոցը կտանի:



«Ելե՛ք,— կասի,— իմ մանուկներ»:  
Ու հենց նրանք իմանան,  
Դուրս կհանեն գլխիկները,  
Աչիկները կբանան:

## Հարցեր և առաջադրանքներ



1. Ի՞նչ ես կարծում, լավ է, որ ձմռանը ձյուն է գալիս:
2. Ծաղիկներին նամակ գրիր և համոզիր, որ չտխրեն:
3. Նկարագրիր քո բնակավայրի ձմեռային բնութայունը:

#### 4. Սովորիր ճիշտ կարդալ և գրել:

ոռգ, սպիրակ, երգ, ջյուն, արև, կենդանի

Կարդա՛ այս բանաստեղծությունը և պատասխանիր փոքրիկ հերոսի հարցերին:

### ՀՐԱՆԱԼԻ ՆԿԱՐԸ

*Ռուբեն Ղարիբյան*

Ո՞վ է արել,  
Ո՞վ է արել,  
Մեր սենյակի լուսամուտին  
Ո՞վ է նկարն այս նկարել...  
Նկարի մեջ՝ ճերմակ ծառեր,  
Նկարի մեջ՝ ձյունոտ սարեր,  
Իսկ սարի տակ, անտառի տակ՝  
Սառույց կապած մի լուռ գետակ:  
Իսկ գետակից մի քիչ հեռու  
Վիզը բարակ մի եղջերու  
Կարծես կանգնել  
Ինձ է նայում:  
Իսկ անտառում՝  
Թփերի տակ,  
Կուչ է եկել  
Մի նապաստակ:  
Գուլցե խաբել քաջ որսորդին,  
Մտել է նա այս թփի տակ...  
Հրաշալի, սիրուն նկար,  
Ո՞վ է արել:





Ո՞վ է արել,  
 Բայց նկարն այս երեկ չկար,  
 Մեր սենյակի լուսամուտին  
 Ո՞վ է նկարն այս նկարել:



- 5. Նկարագրիր պատուհանի նախշերը ցուրտ ձմռանը:  
 Կարդա՛ առարկայի հատկանիշ ցույց տվող բառերը:
- 6. Նկարիր պատուհանի նախշերն ըստ բանաստեղծության:
- 7. Բանաստեղծության մեջ գտի՛ր առարկան և իր հատկանիշը ցույց տվող երեքական բառազույգ:

**8. Գրի՛ր ինքնաթելադրություն:**


*Կգա գարնան արևն էլ էպր  
 իր շողերով կենդանի,  
 Զնուն սաստիկ ցրտերի հեպր  
 Զյուն – ծածկոյր կրանի:*

**9. Ուշադիր կարդա ձախ և աջ սյունակում տրված բառաշարքերը: Որոշի՛ր՝ դրանցից որն է իմաստ, միտք արտահայտում:**

ձյուն, նկարել, պատուհանի, է, նկարել

Պատուհանի վրա ձյունը աստղեր է նկարել:

Ճիշտ ես. աջ սյունակի բառերը միտք են արտահայտում, ուրեմն աջ սյունակում տրվածը նախադասություն է:



## ՇՆՈՐՀԱՎՈՐ ՆՈՐ ՏԱՐԻ ԵՎ ՍՈՒՐԲ ԾՆՈՒՆԴ

Շատ դարեր առաջ հայերը Նոր տարվա սկիզբ են համարել մարտի 21-ը: Այդ տոնը կապել են բնության արթնանալու՝ գարնան հետ: Հետագայում նրանք Նոր տարվա սկիզբ համարել են հին հայկական օրացույցի առաջին ամսվա՝ Նավասարդի 1-ը: Նոր օրացույցով դա օգոստոսի տասնհինգն է և կապված է բերքահավաքի տոնի հետ: Իսկ հիմա Նոր տարին նշում են հունվարի 1-ին: Նոր տարվա տոնը հայերն անվանել են նաև Ամանոր, Կաղանդ: Այդ օրը, ինչպես ամեն տեղ, հայ մանուկներին ևս հյուր են գալիս Ձմեռ պապն ու Ձյունանուշը և նվերներ բաժանում նրանց:



## Սովորություն

Նոր տարվա օրերին հայերի տանը բացվում է շքեղ սեղան: Մարդիկ այցելում են միմյանց: Երիտասարդները նույնպես հավաքվում են և այցելում իրենց գերդաստանի մեծերին, շնորհավորում նրանց տարեմուտը:

## Հարցեր և առաջադրանքներ



1. Պատմիր՝ հնում երբ են հայերը նշել Նոր տարին:
2. Ինչպես են այժմ նշում Ամանորը Հայաստանում: Իսկ դու ինչպես ես այն տոնում:

## ՆՈՐ ՏԱՐԻ

### Գեղամ Սարյան

Եկել, նստել էր սարին  
Մեր սիրելի Նոր տարին.  
Այս գիշեր նա եկավ տուն,  
Բերեց երգ ու խնդություն:  
Բերեց սիրուն տոնածառ,  
Վրան՝ լույսերը պայծառ,  
Խաղալիքներ գեղեցիկ,  
Դեղձանիկներ երգեցիկ,  
Բադ, եղջերու և կարապ  
Ու ծառի տակ՝ Ձմեռ պապ:  
Բարով եկար, Նոր տարի,  
Բեր խաղաղ կյանք ու բարի:



3. Դիտելով նկարը՝ դու նույնպես նկարագրիր քո բնակավայրի ձմեռային բնությունը:




4. Պատմիր քո անցկացրած ամենահետաքրքիր Նոր տարվա մասին:

5. Սովորիր ճիշտ կարդալ և գրել:


*երգ, եղգերու, չյուն, չՏեռ, դեղչանիկ, կյանք,  
կենդանի, սպիրակ*

6. Բանաստեղծության տողերում գտիր և կարդա՝ առարկա, առարկայի հատկանիշ և առարկայի կատարած գործողություն ցույց տվող երեքական բառ:



## ՀԱՅԵՐԸ ԱՌԱՋԻՆ ՔՐԻՍՏՈՆՅԱ ԱՋԳՆ ԵՆ

301 թվականին քրիստոնեությունը Հայաստանում ընդունվեց որպես պետական կրոն: Ամենայն հայոց առաջին կաթողիկոս դարձավ Գրիգոր Լուսավորիչը: Հայաստանում կառուցվեցին բազմաթիվ եկեղեցիներ ու վանքեր:



Հայերը որ երկրում ապրում են, այնտեղ առաջին հերթին եկեղեցիներ են կառուցում և իրենց զավակների հետ միասին այցելում հայկական եկեղեցիներ:

### Հարցեր և առաջադրանքներ



**1.** Ո՞ւմ անունով ենք մենք կոչվում քրիստոնյա:

## ՓՈՔՐԻԿԻ ԱՂՈԹՔԸ

Ո՛վ անուշաիրտ Մայր Հիսուսի,  
Լսի՛ր, խնդրեմ, ձայնն իմ սրտի.  
Ամանորի արշալույսին  
Խաղաղություն տուր աշխարհին:  
Ծնողներիս գլխի վերև  
Թող միշտ ժպտա պայծառ արև,  
Եվ բոլորը՝ մեժ ու պստիկ,  
Ապրեն անհոգ ու երջանիկ:  
Հիվանդներին հասի՛ր դու, Մայր,  
Սրբի՛ր արցունքն ու ցավը տա՛ր  
Եվ հայ ազգին մեր ցիրուցան  
Միավորի՛ր, եղի՛ր պաշտպան:

2. Ո՞ւմ է ուղղում իր աղոթքը փոքրիկը:
3. Ուշադիր կարդա և որոշի՛ր, թե ինչեր է խնդրում փոքրիկը Մարիամ Աստվածածնից:
4. Իսկ դու ի՞նչ կխնդրեիր Մարիամ Աստվածածնից:
5. Որոշի՛ր **անուշաիրտ** և **Ամանոր** բառերի արմատները:

### Հիշի՛ր

Դու հիշում ես, որ բառերի առջևից կամ վերջից կարող են մասնիկներ ավելանալ և նոր իմաստ հաղորդել բառին: Այդ ավելացող մասնիկները **ածանցներ** են:



**6. Տրված բառերին ավելացրո՛ւ համապատասխան նախածանցներ և վերջածանցներ: Ասո՛ւ ստացված բառերը.**

հայ	տոն	որս	վախկոտ
գարուն	հուր	թույլ	գեղեցիկ


**Ավանդույթ**

Գրիգոր Լուսավորչին երևում է մի տեսիլք<sup>1</sup>: Երկնքից հայտնված հրեղեն<sup>2</sup> սյան միջով իջնում է Քրիստոսը: Նա ձեռքի ոսկե մուրճով ցույց է տալիս Վաղարշապատում գտնվող մի բլուր՝ իբրև տաճարի<sup>3</sup> կառուցման վայր:

Հենց այստեղ էլ կառուցվում է տաճար, անունը՝ Էջմիածին, այսինքն՝ իջավ Աստծո Միածին որդին՝ Քրիստոսը: 301–303 թվականներին կառուցված այդ տաճարը դարձավ հայ ժողովրդի գլխավոր սրբավայրը<sup>4</sup>:

**Իմ բառարանը**

- <sup>1</sup> **տեսիլք** – թվացյալ պատկեր, երազ
- <sup>2</sup> **հրեղեն** – հրից բաղկացած, կրակից կազմված
- <sup>3</sup> **տաճար** – եկեղեցական շքեղ շինություն
- <sup>4</sup> **սրբավայր** – սուրբ վայր, ուխտատեղի



## ԶԱՏԻԿ



Զատիկը նշում են գարնանը՝ Քրիստոսի հարության օրը: Հայերը Զատկի տոնին ձու են ներկում, օրհնել տալիս, նվիրում միմյանց և ուտում: Ձուն համարվում է հարության և նոր կյանքի սկիզբ:

Սուրբ Գրիգոր Տաթևացին ասում է, որ ձվի կեղևը նման է երկնքին, թաղանթը՝ օդին, իսկ սպիտակուցը՝ ջրին: Դեղնուցը նա նմանեցնում է երկրին: Իսկ կարմիր ներկը խորհրդանշում է, որ աշխարհը փրկվեց Քրիստոսի արյամբ:

Հայերը Զատկից մեկ ամիս առաջ մեծ ափսեի մեջ բամբակ են փռում, թրջում և վրան լցնում գարու հատիկներ: Ամեն օր ջրում են գարու հատիկները: Դրանք կանաչ ծիլեր են տալիս: Զատկի օրը ձվերը ներկում են կանաչ, դեղին, կապույտ և շարում աճած խոտով լի ափսեի մեջ: Տանտիրուհին բրնձով փլավ է եփում և վրան լցնում



չամիչ, ընկույզ, չրեր: Երեկոյան ընտանիքը և հյուրերը հավաքվում են ճաշի սեղանի շուրջ: Ընտանիքի ավագը բաժակ է բարձրացնում և ասում. «Քրիստոս հարյավ<sup>2</sup> ի մեռելոց»: Սեղանի շուրջ նստածները պատասխանում են. «Օրհնյա՛լ է հարությունը Քրիստոսի»:


## Իմ բառարանը

- <sup>1</sup> **թաղանթ** – նուրբ ու ճկուն մաշկանման պատյան
- <sup>2</sup> **հարյավ** – այստեղ՝ վերակենդանացավ, հարություն առավ



### Հարցեր և առաջադրանքներ

1. Ե՞րբ են նշում Զատիկը:
2. Զատիկի օրը ինչպե՞ս են միմյանց ողջունում մարդիկ: Անգիր սովորիք այդ խոսքերը.



3. Պատմի՛ր, թե ինչպես են տոնում Զատիկը ձեր տանը:



## ՉԱՏԻԿԸ

Գրիգոր Եղիկյան

Ես զատիկն եմ,  
 Ես զատիկն եմ,  
 Մեր պարտեզի  
 Մի հատիկն եմ:  
 Հյուր եմ գալիս  
 Գարնան օրով,  
 Ինքս՝ կլոր,  
 Կարմիր շրոով:

Ման եմ գալիս  
 Ծաղկեծաղիկ,  
 Ծծում նեկտար<sup>1</sup>,  
 Խմում շաղիկ<sup>2</sup>,  
 Ամբողջ օրը  
 Թևիս տալիս,  
 Մեր պարտեզում  
 Պար եմ գալիս:

Մեջքիս ունեմ  
 Սև-սև պուտեր,  
 Ունեմ մանրիկ,  
 Սիրուն տոտեր,  
 Թևիկներ էլ  
 Ունեմ բարակ,  
 Թռչկոտում եմ  
 Թեթև, արագ:

Երբ արևը  
 Մայր է մտնում,  
 Իմ հին բույնը  
 Էլ չեմ գտնում:  
 Որ թփում էլ  
 Տանի քունս,  
 Հենց այնտեղ է  
 Լինում բույնս:

### Իմ Բառարանը

<sup>1</sup> նեկտար – քաղցր ծաղկահյութ

<sup>2</sup> շաղիկ – ցողիկ, ցողի կաթիլ

4. Պատմիր՝ ինչ իմացար **զատիկ** միջատի մասին:



## ԱՄԵՆԱՆՎԻՐԱԿԱՆ ՏՈՆԸ

Մայրության և գեղեցկության տոնը Հայաստանում նշում են ապրիլի յոթին: Տոնին կանանց և աղջիկներին ծաղիկներ, բացիկներ ու ջերմ խոսքեր են նվիրում և շնորհավորում գարնանային գեղեցիկ օրվա առթիվ: Այդ օրը, ըստ քրիստոնեական կրոնի, Քրիստոսի ծննդյան ավետման<sup>1</sup> օրն է:



### Իմ բառարանը

<sup>1</sup> ավետել – բարի լուր տալ

### Հիշիր

Բառերի այն խումբը, որը միտք է արտահայտում, կոչվում է **նախադասություն**:

*Օրինակ՝* Մայրերի տոնը գարնանն է:

Բոլոր մայրերը գեղեցիկ են ու բարի:

## Հարցեր և առաջադրանքներ



1. Հաշվիր, թե քանի նախադասություն կա «Ամենանվիրական տոնը» պատմության մեջ:
2. Կարդա՛ պատմության առաջին նախադասությունը, **ի՞նչ են անում** հարցի օգնությամբ որոշիր գործողություն ցույց տվող բառը:

## ՄԱՅՐԻԿԻՍ

### Հարություն Հովնաթան

Ո՞վ է կանչում ինձ, այն ո՞վ,  
Մայրս՝ անուշ իր ծայնով:  
Ո՞վ է ասում ինձ՝ ծագո՞ւկ.  
Մայրս՝ շնչով իր տաքուկ:  
Գիտեմ՝ բարի են, բարի  
Բոլոր մայրերն աշխարհի,  
Բայց աշխարհում ինձ համար  
Մի աշխարհ կա ու մի մայր:



3. Տրված բառերը դասավորիր այնպես, որ ստացվեն նախադասություններ:

1. նրանց ծառագայթները արևի զերմայնում էին

2. բացի Տասնակցում էին Միզոցառմանը բոլորը  
Նինախիբից

3. կարարները բարդիների փամփայ ուժեղ խոնարհվեցին

## Հիշիր

Առարկա ցույց տվող բառը կոչվում է **գոյական**:

*Օրինակ՝* դասարան, ծառ, սեղան և այլն:

Առարկայի գործողություն ցույց տվող բառը կոչվում է **բայ**:

*Օրինակ՝* գնացինք, նկարում են, ծաղկել է:




## Ժողովուրդն ասում է...

*Մոր սիրտը իմաստուն է:*

*Մայրը տան ճրագն է:*

*Մոր սիրտը տիեզերք է:*

*Մայրը ընտանիքի սյունն է:*



## ԳԱՐՈՒՆ

*Ղազարոս Աղայան*

Տարին չորս եղանակ ունի, բայց ամենից գեղեցիկը, ամենից հաճելին գարունն է:

Սառած գետինը տաքանում է ու սկսում կանաչել: Քնած ծառերը բացվում, փթթում<sup>1</sup> են: Երբ տեսնում ես գույնզգույն ծաղիկները՝ արևի շողերով ողողված<sup>2</sup>, կարծում ես, թե փոքրիկ մանուկներ են ժպտում, ճչում, ծիծաղում: Երբ նորեկ թռչուններն էլ ձայն ձայնի տված ծլվլում են, կարծում ես, թե բոլորը, ձեռք ձեռքի տված, պար են գալիս, ցնծում<sup>3</sup>, զվարճանում, գարնան գալը շնորհավորում:



Ամենքն էլ ուզում են, որ գարունը շուտ գա և իրենց անուշ արև ու քաղցր օրեր բերի:

### Իմ բառարանը

- <sup>1</sup> **փթթել** – փարթամորեն աճել
- <sup>2</sup> **ողողվել** – այստեղ՝ պատվել, լցվել
- <sup>3</sup> **ցնծալ** – սաստիկ ուրախանալ



## Ժողովուրդն ասում է...

Մի ծաղկով գարուն չի գա:  
Մի ձեռքը ծափ չի տա:

### Հարցեր և առաջադրանքներ



1. Նկարագրիր՝ ինչպես է արթնանում բնությունը:
2. Ի՞նչ զգացումներ է ունենում մարդը գարնան գալու հետ: Պատմիր քո ուրախության մասին:

### ԵՍ ԳԱՐՈՒՆ ՏԵՍԱ

*Վրեժ Վարդունի*

Ես գարուն տեսա  
Ամեն բույսի մեջ,  
Կանաչ լույսի մեջ,  
Արշալույսի մեջ:

Ես գարուն տեսա  
Ծաղկանց աչքի մեջ,  
Թռչնի կանչի մեջ,  
Ծով կարկաչի մեջ:

Ես գարուն տեսա  
Շանթ ու շողի մեջ,  
Հուլունք ցողի մեջ,  
Տաքուկ հողի մեջ:

3. Բանաստեղծն ինչպե՞ս է գարունը «ճանաչում»:
4. Իսկ դու, գարուն ասելով, ի՞նչ ես պատկերացնում:

5. Հետաքրքրվիր ծնողներիցդ նրանց ծննդավայրի գարնանային բնության մասին: Նկարիր ըստ նրանց պատմածի:
6. Պատրաստվիր թելադրություն գրելու:

## ԳԱՐՈՒՆ

Գարունը դաշտերից քշեց ձյունը: Դեղնած ու թաց տերևների տակից երևաց կանաչ խոտը: Ծառերն սկսեցին բողբոջել: Մեղուներն արթնացան քնից:




## Հիշիր

Այն բառերը, որոնք ցույց են տալիս առարկայի հատկանիշ և պատասխանում են ինչպիսի՞, որպիսի՞ հարցերին, կոչվում են **ածական**:

## Ժողովուրդն ասում է...

*Ով գարնանը քնի, աշնանը լաց կլինի:*

# ՏԱՍՆՀԻՆԳԵՐՈՐԴ ԴԱՍ



## ԿՐԱԿՆ ՈՒ ԶՈՒՐԸ

*Սուրեն Մուրադյան*

Կրակն ու ջուրը  
Շատ հին ժամանակ  
Քույր–եղբայր էին  
Մի հաշտ<sup>1</sup> հարկի տակ:  
Բայց քույր ու եղբայր  
Վիճում են մի օր,  
Թե ով է արդյոք  
Իրենցից հզոր:  
Ու քույր կրակը  
Բարկանում է շատ,  
Կրակ է տալիս  
Սարի խոտ ու դաշտ:  
Եղբայր ջուրն հազիվ  
Կրակն է մարում...  
Ու այդ օրվանից  
Բաժան են ապրում:

Բայց ինչ էլ լինի,  
Քույր են ու եղբայր,  
Պապական կանչով<sup>2</sup>  
Կապված են իրար:  
Երբ եղբայր ջուրն է  
Սառնամանիքին  
Ձմռանը սառչում,  
Քույրը ասում է.  
— Տաքացի՛ր, եղբայր,  
Ջուր ես ամաչում:  
Երբ քույր կրակը  
Կիզիչ<sup>3</sup> ամռանը  
Խաշվում է բոցում,  
Եղբայրն ասում է.  
— Խմի՛ր, քույրի՛կ ջան,  
Սիրտդ հովացրո՛ւ:

### Իմ բառարանը

- <sup>1</sup> **հաշտ** – համերաշխ, սիրով
- <sup>2</sup> **պապական կանչ** – այստեղ՝ արյան կանչ
- <sup>3</sup> **կիզիչ** – այրող

## Հարցեր և առաջադրանքներ



1. Պատմիր, թե դու ինչ բառերով ես դիմում քույրիկիդ, եղբորդ: Իսկ ի՞նչ բառերով ես դիմում հայրիկին, մայրիկին, պապիկին:
2. Պատմիր բանաստեղծության բովանդակությունը՝ մանրամասնորեն ներկայացնելով քույր ու եղբոր խոսակցությունը:
3. Ածականների օգնությամբ բնութագրիր ընտանիքիդ անդամներին:
4. Բացատրիր այս խոսքերի իմաստը.

### Ժողովուրդն ասում է...

- Քաղցր լեզուն օձը բնից կհանի:
- Օձի կծածը կլավանա, լեզվի կծածը չի լավանա:

5. Սովորիր ճիշտ կարդալ և գրել:

եղ.այր, ֆն.ուշ, աշխար., կապու.յր, Մար.իկ,  
թա.ամել, չե.ֆեր, խի.Ն, ար.

**6. Գուշակիր հանելուկների պատասխանները:** Այդ բաների հետ գործածիր հարմար ածականներ և բայեր:

Ես՝ բուրավետ, ես՝ վառվռուն,  
Ես՝ ավլան ծաղիկ սիրուն,  
Ես՝ քույրերիս միջի զարդը,  
Այդ էս եմ, ես եմ՝ ...ը:

Ծնվեց նա ճերմակ.  
Ծնվեց՝ կարծրացավ,  
Երբ ջրին հյուսվեց,  
Զուրը քաղցրացավ:


**7. Անգիր սովորիր բանաստեղծությունը:** Փորձիր նկարել ըստ բովանդակության:

## ԳԱՐՈՒՆ

*Հայրապետ Հայրապետյան*

— Ես մանուկ եմ ծաղկավետ,  
Զգեստներս՝ հոտավետ,  
Դեմքս՝ պայծառ, ժպտերես.  
Ասե՛ք տեսնեմ ղով եմ ես:  
— Դու գարունն ես ցանկալի,  
Սիրուն զարդը աշխարհի,  
Բերում ես վարդ, մանուշակ,  
Անթիվ երգեր ու թռչնակ:





## ՍՈՒՆԱԿՆ ՈՒ ՈՋՆԻՆ

*Ջուլիետա Գյուլամիրյան*



Անտառի բացատում՝ տոնավաճառ էր: Վաճառում էին մորթի, փետուր, կաշի, փշեր: Հավաքվել էին կենդանիները և առևտուր էին անում: Այնտեղ էին նաև սոխակն ու ոզնին: Նրանք այն ժամանակ դեռ մերկ էին: Ոզնին տնտղում<sup>2</sup> էր վաճառվող փշերը և սոխակին համոզում, որ ինքն էլ փուշ գնի:

— Ես կգնեմ փափուկ փետուրներ: Ինձ պետք չեն փշերը,— ասում էր սոխակը:— Ես այնպիսի քնքուշ ծայն ունեմ և այնպես քաղցր եմ երգում, որ ոչ ոք ինձ վնաս չի պատճառում, բոլորն ինձ սիրում են: Ես շրջապատի վրա կարող եմ ազդել իմ քնքշությամբ ու խելքով:

Ոզնին երկար մտածեց, փորձեց փշերը և ընտրեց դրանցից ամենասուրերը: Փշերն ընտրելուց և իր վրա շարելուց հետո պտտվեց, հիացավ իրենով և քթի տակ մռթմռթաց:

— Ինձ ոչ ոք բանի տեղ չի դնում, ոչ մեկը չի նկատում իմ գոյությունն անտառում: Ա՛յ, հիմա այս փշերով ես կծակեմ բոլորին, որպեսզի բոլորն ինձնից վախենան:

## Իմ Բառարանը

- բացատ** – անտառում բաց տեղ, ազատ տարածություն
- տնտղել** – զննել, շոշափելով քննել, ծանրութեթև անել

## Հարցեր և առաջադրանքներ



1. Ինչո՞ւ սոխակին փշեր պետք չէին:
2. Ինչո՞ւ ոզնին ընտրեց ամենասուր փշերը:
3. Պատմվածքն այնպե՞ս պատմիր, որ ոզնին փշեր չզնի:
4. Պատմվածքին շարունակություն հյուսիր:
5. Գուշակի՞ր հանելուկի պատասխանը:

Այն ո՞վ է, որ  
Ունի ասեղ անհամար,  
Բայց ոչ մի շոր  
Դեռ չի կարել իր համար:

**6. Պատրաստվիր փոխադրություն գրելու:**

**ՈՂՆԻՆ**


Ողնին այգու բարեկամն է: Նա ոչնչացնում է վնասատուներին: Ողնին խաղող է սիրում: Նա իր փշերի վրա հավաքում է խաղողի հատիկները և տանում տուն: Տանը ողնու ձագերն ուտում են խաղողի քաղցր հատիկները:



**7. Գտիր տրված գոյականներին, բայերին և ածականներին տրվող հարցերը:**

վաճառում էին	ծակող	համոզեց
մորթի	ընտրել	սիրում են
մերկ էին	սուր	կծակեմ
շողշողուն	վախեցած	քնքուշ





## ԿՈՒՎԸ ԳԼՈՒԽ ՉԵԿԱՎ



*Ավետիք  
Իսահակյան*

Երկու ծերունիներ ապրում էին մի բակում:  
Նրանց միջև ոչ մի անգամ վեճ ու կռիվ  
չէր ծագել: Եվ ահա մի օր էլ ծերունիներից  
մեկն ասաց մյուսին.

— Այդ ինչպե՞ս է լինում, որ մարդիկ իրար  
հետ կռվում են: Արի՛ մի անգամ էլ մենք կռվենք:

Մյուսը պատասխանեց.

— Ես չգիտեմ, թե ինչից է ծագում կռիվը:

Առաջին ծերունին ասաց.

— Ահա այս կավե ամանը մեջտեղ եմ դնում. ես կա-  
սեմ՝ դա ի՛մն է, դու էլ թե՛ չէ՛, քոնը չէ, ի՛մն է: Սրանից էլ  
վեճ կծագի, վեճից էլ՝ կռիվ:

Այդպես էլ արին: Նրանցից մեկն ասաց.

— Դա ի՛մն է:

Մյուսը պատասխանեց.

— Իսկ ես գիտեմ, որ դա ի՛մն է:

Առաջինը նորից ասաց.

— Չէ՛, քոնը չէ, ի՛մն է:

Այդ ժամանակ երկրորդ ծերունին պատասխանեց.

— Իսկ եթե քոնն է, վերցրո՛ւ, քե՛զ լինի:

Այդպես էլ իրար հետ նրանց կռիվը գլուխ չեկավ:

## Հարցեր և առաջադրանքներ



1. Ինչո՞ւ հարևանների կռիվը չստացվեց:
2. Մտածիր՝ ընկերների մեջ ինչից կարող է կռիվ ծագել:
3. Պատահե՞լ է, որ ընկերոջդ հետ կռվես: Պատմիր այդ մասին: Ինչո՞վ ավարտվեց ձեր վեճը:

### Ժողովուրդն ասում է...

Կռվի մեջ փլավ չեն բաժանում:

#### 4. Գրիր ինքնաթելադրություն:

— Նորի՛ այնֆա՛ն ծանոթանա՛նք,

Որ սկսե՛նք ՏրերՏանա՛յ:

Իերո այնֆա՛ն ՏրերՏանա՛նք,

Որ սկսե՛նք ընկերա՛նայ:

#### 5. Հետաքրքիր է՝ դու գիտե՞ս...

- Ինչո՞վ են լվանում ատամները:
- Այն ի՞նչն է, որ շատ թթու է:
- Ո՞վ է վարում նավը:
- Ի՞նչ են ասում ոչխարների խմբին:
- Լուլիկն ու վարունգը ի՞նչ են:
- Ի՞նչ են ասում կոշիկ նորոգողին:
- Ի՞նչ են ասում կոշիկ կարողին:

**6. Դու քո մասին կարո՞ղ ես ասել.**


- Ես իմ ընկերների հետ չեմ կռվում:
- Ես օգնում եմ տատիկիս ու պապիկիս:

**7. «Կռիվը գլուխ չեկավ» պատմվածքի մեջ գտիր այն նախադասությունը, որը հարցում է արտահայտում: Մեկ անգամ ևս կարո՞ւմ այդ նախադասությունը: Ասա՛ ով ում է տալիս այդ հարցը:**

## Հիշիր

Հարցում արտահայտող նախադասությունները կոչվում են **հարցական նախադասություններ**:

Հայերենում հարցական նշանը դրվում է հարցում արտահայտող բառի վերջին ձայնավորի վրա:



## ՊԱՅՄԱՆ

*Յուրի Սահակյան*



— Բարև,— ասաց փոքրիկ տղան:  
— Հազար բարին,— ասացի ես:  
— Ընկեր չունե՞ս,— հարցրեց տղան:  
— Այստեղ չունեմ,— ասացի ես:  
— Կուզե՞ս ինձ հետ ծանոթանալ:  
— Ծանոթանանք,— ասացի ես:  
— Անունդ ի՞նչ է,— հարցրեց տղան:  
Իմ անունը ասացի ես:  
Հետո այսպես ասաց տղան.  
— Արի՛ այնքան ծանոթանանք,  
Որ սկսենք մտերմանալ:  
Հետո այնքան մտերմանանք,  
Որ սկսենք ընկերանալ:  
Հետո այնքան ընկերանանք,  
Որ սկսենք եղբայրանալ:  
Հետո այնքան եղբայրանանք,  
Որ բաժանվել չկամենանք  
Ո՛չ խաղի մեջ,  
Ո՛չ փորձանքում,  
Ո՛չ էլ ամբողջ ամբողջ կյանքում:



## Հարցեր և առաջադրանքներ



1. Ինչո՞ւ է բանաստեղծությունը վերնագրված «Պայման»: Ինչի՞ մասին պայմանավորվեցին տղաները:
2. Մտածի՛ր և դատի՛ր. պարտադիր է արդյոք ընկեր ունենալը:

### Ժողովուրդն ասում է...

- Ընկերը փորձանքի մեջ է ճանաչվում:
- Ասա՛՛ ով է ընկերդ, ասեմ՛՛ ով ես դու:
- Հագուստի նորն է լավը, ընկերոջ՝ հինը:

3. Սովորի՛ր ճիշտ կարդալ և գրել:

բարև, եղբայր, եղբայրանայ, փորջանիք, ամբողջ,  
կյանիք

4. Պատրաստվի՛ր թելադրություն գրելու:

### ԸՆԿԵՐԱՍԵՐ ԱՂՋԻԿՆԵՐԸ

Մարիան իմ ընկերուհին է: Մենք սովորում ենք նույն դասարանում: Մարիանի եղբայրը Մեյ Էնթոնի Միչը դպրոց է գալիս: Մենք որոշել ենք ամբողջ կյանքում Միսսին լինել:

## 5. Պատմիր քո մտերիմ ընկերոջ մասին:


### ԻՄ ՄՏԵՐԻՄ ԸՆԿԵՐԸ

- Ո՞վ է քո մտերիմ ընկերը:
- Ինչո՞վ է նա զբաղվում:
- Որտե՞ղ եք ծանոթացել:
- Ինչպիսի՞ հատկանիշներ ունի նա:

### Հիշիր

Պատմելու ձևով ասված նախադասությունը կոչվում է **պատմողական նախադասություն**:

*Օրինակ՝* Իրար հանդիպեցին երկու տղա: Նրանք որոշեցին բարեկամանալ:



## ՈՒՋՈՒՄ ԵՍ, ՈՐ ՔԵՁ ՀԻՇԵՆ

*Ըստ Հայկ Խաչատրյանի*

«Թե ուզում ես, որ քեզնից հետո մարդիկ քեզ հիշեն, գավակ ունեցիր, տո՛ւն կառուցիր ու ծա՛ն տնկիր»: Սա հայկական ամենահին ժողովրդական թևավոր խոսքերից է:

Ծառը բարիքի աղբյուր է. միրգ է տալիս, օդը մաքուր է պահում, պահպանում է հողի վերին շերտը, վառելիք և շինանյութ տալիս:

Հին Հայաստանում գարնանամուտին՝ մարտի 1-ից մինչև ապրիլի 26-ը, եղել է ժողովրդական մի տոն, որի ժամանակ կատարվել են ծառատնկումներ: Այդ տոնին մասնակցել են փոքրիկ տղաներն ու աղջիկները: Նրանք մեծերի օգնությամբ ու խորհուրդներով փոս են փորել, շիվ տնկել ու ջրել: Ծառ տնկող մարդը կապվում է այդ վայրի հետ ամուր հիշողությամբ:

### Հարցեր և առաջադրանքներ



#### 1. Ասա՛ մեկ բառով.

ծառ տնկելուն –  
խորհուրդ տվողին –  
քար տաշողին –

ջրի հորին –  
հայրենիքը սիրողին –  
ծնողին սիրողին –

## Ժողովուրդն ասում է...

Մարդն իր գործով է անմահ:

Հավ գործ անողին երբեք չեն մոռանում:

## 2. Կարդա՛ պատմության վերնագիրը: Որոշի՛ր՝ ինչպիսի նախադասություն է այն:

### ԿՏԱԿ

### Սարմեն

Իմ մանկիկներ, իմ ծաղիկներ,  
Լսե՛ք կտակը ձեր հոր  
Եվ սերնդից սերունդ անմեռ<sup>1</sup>  
Ավանդեցե՛ք<sup>2</sup> նորից նոր:



Դուք ձեր մորը ջերմ սիրեցեք,  
Պահե՛ք ինչպես ծաղկեփունջ,  
Նա ձեզ համար գիշեր-ցերեկ  
Կյանք է մաշել անտրտունջ<sup>3</sup>:

Դուք ձեր ծնող մայր-արևի  
Փառքը տարե՛ք ծեփից ծեփ<sup>4</sup>,  
Բայց ձեր մորից է՛լ ավելի  
Հայրենի՛քը սիրեցեք:

Նա է աղբյուրն անմահական,  
Մայրը բոլոր մայրերի,  
Նա է տալիս մորն ու մանկան  
Բարիքները աշխարհի:



## Իմ բառարանը

- <sup>1</sup> **անմեռ** – անմահ, չմեռնող
- <sup>2</sup> **ավանդել** – սերունդներին փոխանցել
- <sup>3</sup> **անտրտունջ** – առանց տրտնջալու, առանց դժգոհելու
- <sup>4</sup> **ծեզ** – արևածագ, լուսաբաց, այստեղ՝ աշխարհի կողմ՝ եզերք, ծայր, սահման

- 3.** Ի՞նչ է կտակում հեղինակը բանաստեղծության տողերում: Բացատրիր կտակած յուրաքանչյուր պատվիրանը:
- 4.** Պատմիր քո ծնողների, պապիկի, տատիկի՝ քեզ ուղղված պատվիրանների մասին:
- 5.** Բանաստեղծության տողերում փնտրիր և կարդա՛ *ան-* նախածանց ունեցող բառերը, որոշիր դրանց արմատները:
- 6.** Գրիր ինքնաթելադրություն:

*Խայրենիքից անուշ ու թանկ*

*Նարիչ ի՞նչ կա երկնքի փակ.*

*Նա է փվել ինչ հայ անուն*

*Ու պարզել է հայոց լեզուն:*

- 7.** Ուշադիր կարդա «Կտակ» բանաստեղծության շեշտված բառերը: Դու ճիշտ ես. դրանք հրահանգ, հանձնարարություն, հրաման են արտահայտում: Այսինքն՝ **հրամայական նախադասություններ են:**



## ԻՄ ՊԱՊԸ

*Համո Սահյան*

Իմ պապը տնկել է  
 Մեր գյուղի շիվերը,  
 Իմ պապը պայտել է  
 Մեր գյուղի ձիերը:  
 Իմ պապը մեր գյուղի  
 Պատերը շարել է  
 Եվ բոլոր կամերը  
 Մեն-մենակ քարել է:  
 Ջրել է իր այգին  
 Ու մարգը բահել է  
 Եվ արդար քրտինքով

Իր տունը պահել է:  
 Իմ պապը վարել է,  
 Իմ պապը ցանել է,  
 Իսկ հնձի ժամանակ  
 Ձեռքի մեջ մանգաղի  
 Դաստակը ցավել է,  
 Իմ պապը հողի հետ  
 Խորհել ու խոսել է,  
 Ամպի հետ արտասովել,  
 Ջրի հետ հոսել է:



Այգում, դաշտում, պուրակում  
 Անուշ հյուս էնք հավաքում,  
 Համեղ բան էնք տալիս ձեզ,  
 Դուք ինչպես եք կոչում մեզ:

## Ժողովուրդն ասում է...

Գործը վաղվան մնաց՝ իմացիր՝ կորավ գնաց:  
Աշխատանքը բոլոր բարիքների աղբյուրն է:

### Հարցեր և առաջադրանքներ



1. Ի՞նչ զբաղմունք է ունեցել բանաստեղծության հերոսը՝ պապը: Ընտրիր և նշիր քո կարծիքին համապատասխան տարբերակը.

- կոշկակար
- շինարար
- դերձակ
- հողագործ

2. Գտիր բանաստեղծի գործածած բայերը: Հիշիր, որ դրանք պիտի պատասխանեն **ինչ է արել, ինչ է եղել, ինչ է անում** հարցերին:

Կարդա՛ բայերը և որոշիր, թե ով է կատարել գործողությունները:

3. Պատրաստվիր շարադրություն գրելու: Գրելիքդ նախ պատմիր: Քեզ կօգնեն այս հարցերը.

### ԻՄ ՊԱՊԸ

1. Ո՞վ է իմ պապը:
2. Որտե՞ղ է ապրում նա:
3. Ինչո՞վ է զբաղվում պապիկս:
4. Ի՞նչն է ուշագրավ իմ պապիկի մեջ:


**4. Կարդա՛ բանաստեղծության տողերը՝ հաշվի առնելով երկարացման կամ բացականչական նշանը:**

Իմ պապը տնկել է  
Մեր գյուղի շիվերը,  
Իմ պապը պայտել է  
Մեր գյուղի ձիերը:

### Հիշի՛ր

Բացականչություն, զարմանք, հուզմունք կամ ցանկություն արտահայտող նախադասությունը կոչվում է **բացականչական**:

Կարդալիս բացականչության նշան ունեցող բառը երկար է արտասանվում: Բացականչություն արտահայտող բառի վերջնավանկի ձայնավորի վրա պետք է դնել բացականչական նշան (՛):



## ՈՒԼԻԿԸ

*Հովհաննես Թումանյան*

Խոր անտառում մի այծ է լինում: Ունենում է մի գեղեցիկ ուլիկ: Ուլիկին ամեն օր թողնում է տանը, ինքը գնում է արոտ անելու: Արածում է ու իրիկունը կուրծքը լիքը տուն է գալիս:

Տուն է գալիս, դուռը զարկում ու մկկում, կանչում.

— Սևճիկ ուլիկ,  
Սիրճին բալիկ,  
Ման եմ եկել սարեսար,  
Կաթ եմ բերել քեզ համար:  
Դռնակը բաց՝ ներս գամ ես,  
Անուշ–անուշ կաթ տամ քեզ,  
Սևճիկ ուլիկ, սիրճին բալիկ:

Ուլիկն իսկույն վեր է թռչում, դուռը բացում: Մայրը կաթ է տալիս նրան ու կրկին գնում արոտի:

Էս բոլորը թաքուն տեսնում է գայլը: Մի իրիկուն այծից առաջ գալիս է, դուռը թակում է ու իր հաստ ձայնով կանչում.

— Սևճիկ ուլիկ,  
Սիրճին բալիկ,

Ման եմ եկել սարեսար,  
Կաթ եմ բերել քեզ համար:  
Դռնակը բաց՝ ներս գամ ես,  
Անուշ-անուշ կաթ տամ քեզ,  
Սևնկ ուլիկ, սիրո՞ն բալիկ:

Ուլիկը լսում է, լսում ու պատասխանում.

— Ո՞վ ես դու, քեզ չեմ ճանաչում: Իմ մայրն էդպես չի կանչում: Նա քաղցր ու բարակ ձայն ունի: Քո ձայնը կոշտ է ու կոպիտ: Դուռը բաց չեմ անի... Գնա՛... Չեմ ուզում քեզ...

Ու գայլը հեռանում է: Գալիս է մայրը, դուռը ծեծում.

— Սևնկ ուլիկ,  
Սիրո՞ն բալիկ,  
Ման եմ եկել սարեսար,  
Կաթ եմ բերել քեզ համար:  
Դռնակը բաց՝ ներս գամ ես,  
Անուշ-անուշ կաթ տամ քեզ,  
Սևնկ ուլիկ, սիրո՞ն բալիկ:



Ուլիկը դուռը բացում է, կաթը ուտում ու մորը պատմում.

— Գիտե՞ս, մայրիկ, ինչ եղավ: Մի քիչ առաջ մեկը եկավ, դուռը ծեծում ու կանչում էր.

— Սևնկ ուլիկ,  
Սիրո՞ն բալիկ...

Ասում էր՝ դուռը բաց արա: Էնպես հաստ ձայն ուներ: Էնպես վախեցա, Էնպես վախեցա... Դուռը բաց չարի, ասի՝ չեմ ուզում, գնա՛...

— Պա՛, պա՛, պա՛, պա՛, Սևո՛ւկ ջան: Ի՞նչ լավ է եղել, որ չես բացել,— ասաց վախեցած մայրը:— Դա գայլն է եղել. եկել է, որ քեզ ուտի: Մյուս անգամ էլ որ գա, բաց չանես, ասա՛ գնա՛, թե չէ իմ մայրը քեզ կսպանի իր սուր պոզերով:

## ԱՄԱՌ

### *Ռուբեն Ղարիբյան*

Խաղաղ դաշտերին  
Իջել է ամառ,  
Բերել է երկրին  
Բարիք անհամար:  
Քամին մեղմօրոր  
Համբույր է տալիս,  
Հասկերը շորոր  
Գնում են, գալիս:  
Տանձը դեղնել է,  
Խնձորը՝ շիկնել,

Սեխը ելել է,  
Իր թաղին՝ թիկնել...  
Կրակ է մաղում<sup>2</sup>  
Արևը վերից,  
Խաղողն է շողում  
Կանաչ թփերից...  
Ծաղկած դաշտերին  
Իջել է ամառ,  
Բերել է երկրին  
Բարիք անհամար...

### Իմ բառարանը

<sup>1</sup> թաղ – այստեղ՝ թուփ

<sup>2</sup> մաղել – այստեղ՝ թափվել, ինչպես ջուրը ցնցուղից

## ՏՈՒՆԴԱՐՁ

Աշուր Գալստյան

Հայաստան՝ աշխարհ, դրախտի՛ երկիր,  
Դու՛ սուրբ իջևան՝ Նոյ՛ նահապետի,  
Հայոց քաջերին՝ քո գիրկը կանչիր,  
Ուխտի պիտ գնանք՝ երկիր հայրենի:

Զավակներդ թող միշտ անպարտ լինեն,  
Ապուլապապերի գործով հավերժեն,  
Սուրբ Էջմիածնի լույսով զորանան  
Ու ժայռերի պես միշտ հպարտ մնան:

Երկիր՝ Նաիրի, իմ Հայոց՝ աշխարհ,  
Ծաղկիր՝ ավելի, ոստան՝ հայրենի,  
Թող՝ որդիներդ Արարատ կանչեն,  
Թող՝ արևներդ քեզ հար ջերմացնեն:

Խոսք՝ Ա. Գալստյանի

Երաժշտ.՝ Կ. Խառատյանի

Հա - յա - տան՝ աշ - խարհ, դը - րախ - տի՛ եր - կիր,  
Դու՛ սուրբ ի - ջե - վան՝ Նոյ՛ նա - հա - պե - տի, Հա - յոց քա - ջե - րին՝ քո  
գիր - կը կան - չիր, Ուխ - տի պիտ գը - նանք եր - կիր հայ - րե - նի:





## ՄԵՐ ՏԱՆ ՄԵՋ



Սիկիա  
Կապուցիկյան

Մի գանձ ունենք մեր տան մեջ,  
Նրանով ենք երջանիկ,  
Սեր է տալիս նա անշեջ<sup>1</sup>,  
Նրա անունն է մայրիկ:

Մի ուժ ունենք մեր տան մեջ,  
Հաց է տալիս ու բարիք,  
Բերդի նման անառիկ  
Մեզ պաշտպանում է անվերջ,  
Նրա անունն է հայրիկ:

Մի աստղ ունենք մեր տան մեջ,  
Նա լուսատուն է մեր տան,  
Հույս ու լույս է տալիս մեզ,  
Եվ անունն է Հայաստան:


## ԻՄ Բառարանը

<sup>1</sup> անշեջ – անմար, մշտավառ

## ԾԱՂԻԿՆԵՐ

Լյուդվիգ Դուրյան

Վայ, այս ինչքան ծաղիկներ կան,  
Այս որտեղից նրանք եկան,  
Որ զուգեցին սարալանջը.  
Ինձ ժպտում են ալ կակաչը  
Եվ դեղնավառ հրանունկը  
Եվ արևաչ անմոռուկը,  
Կուժկոտրուկն ու մանուշակը,  
Շուշանների ճերմակ շարքը:  
Վայ, այս ինչքան ծաղիկներ կան,  
Այս որտեղից նրանք եկան,  
Ո՞վ է բերել, ո՞վ՝ այսքանը,  
Որտե՞ղ էին ցուրտ ձմռանը:  
— Ես եմ բերել,— արևն ասաց,  
Ու ժպտալով նայեց նա ցած,—  
Ես եմ բերել, որ դու, տղան,  
Ծաղիկների հետ էլ խաղաս,  
Որ նրանց հետ ու նրանց պես  
Լինես ուրախ ու ժպտերես:  
Տղան ուրախ նայեց վերև,  
Ասաց՝ դու ի՞նչ լավն ես, արև:



## ԱՆԱՀԻՏ ԱՍՏՎԱԾՈՒՀԻՆ

*(ըստ «Ինչ է, ո՞վ է» հանրագիտարանի)*

Հայերը քրիստոնեությունն ընդունելուց առաջ պաշտում էին շատ աստվածների՝ Արամազդ, Աստղիկ, Վահագն, Տիր, Վանատուր: Սակայն բոլորից շատ սիրում էին Անահիտ աստվածուհուն, որը Հայաստանի պահապան դիցուհին էր:



Հայոց Տրդատ թագավորը նրան անվանում էր «Փառքը մեր ազգի և մայրն ամեն բարիքների»:

Հայաստանի զանազան քաղաքներում կառուցված էին Անահիտի շքեղ տաճարները՝ ոսկեղեն մեծ արձաններով: Անահիտի ամենահոյակապ ոսկեղեն արձանը Երիզա քաղաքում էր: Տարին մի քանի անգամ այստեղ մեծ ու շքեղ հանդեսներ էին կազմակերպվում: Դրանցից ամենափառավորը, որը վերածվում էր տոնակատարության, օգոստոսի 15-ին էր: Այդ տոնը կոչվում էր Նավասարդ: Քաղաքի փողոցները տոնակատարության օրերին զարդարում էին, պատուհաններին կախում թանկարժեք կերպասներ: Բոլորը՝ ծերերը, կանայք, երեխաները, գույնզգույն ծաղիկներով, գլխներին պսակներ դրած, դալար ճյուղեր էին նվիրում Անահիտին, երգեր ձոնում նրան...

Նոր տարվա այս տոնակատարությունը տևում էր յոթ օր և յոթ գիշեր:

## Հիշիր

Ամառվա ամիսներն են՝ **հունիս, հուլիս, օգոստոս:**

## ԱՐՋՆ ՈՒ ՕՁԸ

*Ավերիք Իսահակյան*

Ինչպես եղավ, որ մի անգամ  
Արջն ու օձը դարձան ընկեր,  
Ընկեր դարձան ու բարեկամ:  
«Մեկս քնի,  
Մեկս հսկի,  
Իրար շահենք,  
Իրար պահենք,  
Ընկերովի կյանք վայելենք»:  
Այսպես ասին, երդվեցին,  
Իրար ազնիվ խոսք տվեցին,  
Օձը՝ արջին, արջը՝ օձին:  
Անցավ այս կերպ մի ժամանակ:  
Եվ շարունակ  
Երկու ընկեր սիրով, սրտով  
Նստան ելան ու քուն մտան  
Կարգով, հերթով:  
Սակայն օձի սողքը<sup>1</sup> բեկ-բեկ<sup>2</sup>  
Դուր չէր գալիս արջին երբեք:  
Ու մի օր էլ արջը ժայռին

Թիկն էր տվել<sup>3</sup> արևկողի<sup>4</sup>,  
 Հանկարծ օձը ոլոր–մոլոր  
 Եկավ ասես գաղտագողի:  
 Վախ ու կասկածն առավ արջին,  
 Ելավ կանգնեց, նստեց տեղում.  
 — Ես ծուռումուռ գնացողին,  
 Ընկեր լինի, թե կաթնախպեր<sup>5</sup>,  
 Չէ, չեմ սիրում, ես չեմ ուզում:  
 Գոռաց այսպես և թաթն ուժգին  
 Դրեց, սեղմեց օձի գլխին  
 Ու մյուս թաթն օձի մարմնով  
 Մինչև պոչը քաշեց թափով:  
 Ապա մոտիկ հոսող գետին  
 Հանձնեց օձի անկենդան դին:  
 Եվ նայելով ջրերի հետ  
 Նետի նման սուրող օձին՝  
 Գոհ մռթմռթաց բեղերի տակ.  
 «Ա՛յ, ընկերը էսպես շիտակ  
 Պիտի լինի,  
 Դե՛հ, շիփ–շիտակ գնա՛ հիմի»:



## Իմ բառարանը

- 1 **սողք** – սողալը
- 2 **բեկ–բեկ** – ոլոր–մոլոր, ծուռումուռ
- 3 **թիկն տալ** – թիկունքով հենվել, թիկնել
- 4 **արևկող** – արևի տակ նստած, մեջքը արևին արած
- 5 **կաթնախպեր** – մեկ մոր կաթով սնված ոչ հարազատ եղբայրներն իրար նկատմամբ

## Ճանաչիր նրանց:

### Կենդանիներ



ուղտ



առյուծ



վագր



հովազ



արջ



ընձուղտ



սկյուռ



եղջերու



եղնիկ



կապիկ



աղվես



գայլ

### Թռչուններ



բու



բազե



փայտփորիկ



ջայլամ



հոպոպ



սիրամարգ



կաքավ



լոր



փասիան



արագիլ



անթևուկ



արծիվ

## ԲՈՎԱՆԴԱԿՈՒԹՅՈՒՆ

ԱՌԱՋԻՆ ԴԱՍ .....	4
ԵՐԿՐՈՐԴ ԴԱՍ .....	7
ԵՐՐՈՐԴ ԴԱՍ.....	10
ՉՈՐՐՈՐԴ ԴԱՍ .....	13
ՀԻՆԳԵՐՈՐԴ ԴԱՍ.....	17
ՎԵՑԵՐՈՐԴ ԴԱՍ .....	21
ՅՈԹԵՐՈՐԴ ԴԱՍ .....	25
ՈՒԹԵՐՈՐԴ ԴԱՍ.....	29
ԻՆՆԵՐՈՐԴ ԴԱՍ .....	33
ՏԱՍՆԵՐՈՐԴ ԴԱՍ .....	36
ՏԱՍՆՄԵԿԵՐՈՐԴ ԴԱՍ .....	39
ՏԱՍՆԵՐԿՈՒԵՐՈՐԴ ԴԱՍ.....	42
ՏԱՍՆԵՐԵՔԵՐՈՐԴ ԴԱՍ .....	45
ՏԱՍՆՉՈՐՍԵՐՈՐԴ ԴԱՍ .....	48
ՏԱՍՆՀԻՆԳԵՐՈՐԴ ԴԱՍ.....	51
ՏԱՍՆՎԵՑԵՐՈՐԴ ԴԱՍ .....	54
ՏԱՍՆՅՈԹԵՐՈՐԴ ԴԱՍ.....	57
ՏԱՍՆՈՒԹԵՐՈՐԴ ԴԱՍ .....	60
ՏԱՍՆԻՆՆԵՐՈՐԴ ԴԱՍ.....	63
ՔՍԱՆԵՐՈՐԴ ԴԱՍ .....	66
ՆՅՈՒԹԵՐ ԸՆԹԵՐՑԱՆՈՒԹՅԱՆ ՀԱՄԱՐ .....	69

ՋՈՒԼԻԵՏԱ ՀԱՐՈՒԹՅՈՒՆԻ ԳՅՈՒԼԱՄԻՐՅԱՆ



*Դասագիրք  
Սիյուռքի դպրոցների համար*

Հրատարակչության տնօրեն՝ Էմին Մկրտչյան  
Գեղարվեստական խմբագիր՝ Արա Բաղդասարյան  
Համակարգչային ձևավորումը՝ Աննա Գալոյանի  
Սրբագրիչ՝ Գոհար Կիրակոսյան

Տպագրությունը՝ օֆսեթ: Չափսը՝ 70x100 1/16:  
Թուղթը՝ օֆսեթ: Ծավալը՝ 5 տպ. մամուլ:  
Տպաքանակը՝ 2000:



**ՉԱՆԳԱԿ**  
ՀՐԱՏԱՐԱԿՉՈՒԹՅՈՒՆ

ՀՀ, 0051, Երևան, Կոմիտասի պող. 49/2  
Հեռ.՝ (+37410) 23-25-28, հեռապատճեն՝ (+37410) 23-25-95  
Էլ. փոստ՝ info@zangak.am  
Էլ. կայքեր՝ www.zangak.am, www.book.am, www.dasagirq.am